



Jumat, 27 Agustus 2021
Ogen: Rut 4:1-12



Rut Ras Boas Erjabu



Perjabun mekatep iandingken bagi mbagun sada rumah. I bas mbangunsa ibenaken alu erbahan palas si enteguh. Sabap paguh ras langna jabu e mbue ipengaruhi palas. Palas e me Tuhan Jesus si rusur si andingkan jadi batu palas si enteguh. Tambah si e perlu kal metenget dengen erlajar karakter ras biak teman geluhta. Reh bagesna penandaita, reh pentarna kita muat ukurna, seh maka banci kita siangkan. Ulihna, jabunta maba keriahen ras kemalemen ate.

Perjabun Rut ras Boas, jadi sada usihen man banta, kerna nggit siangkan pekepar. Boas meteh kecibal Rut si enggo mbalu ras la ersima-sima. Diberu si enggo mbalu i bas adat kalak Jahuadi la meherga. La banci man bana erta tading-tadingen perbulangenna pala ia itebus, iempoi biak senina perbulangenna. Adi bage kerina erta perbulangenna e banci mulihken man bana, ras ia pe jadi kalak si meherga i bas keluarga ras masyarakat. Kai silakoken Boas? Megermet ia ngidah adat si lit, ijumpaina keluarga Elimelek ras pertua-pertua kuta guna encakapkensa. Gelah gelar Elimelek la masap dengen tetap mahaga, ertana e arus itebus si biak seninan, bagepe muat Rut jadi ndeharana. Alu bage keluarga Elimelek nggeluh mulihi. Surut ukur senina Elimelek, emaka la ia nggit nukursa. Mekuah ate Boas, emaka itebusna taneh Elimelek e ras njadikan Rut jadi ndeharana bagepe engkelengi Naomi.

Mekuah ate ras keleng ate e me biak si perlu ipebelin i bas perjabun. Boas dem alu keleng ate, Rut ras Naomi pe nggeluh si keleng-klengen. Nggeluh si keleng-kelengen e me erbahansa jabu Boas ras Rut dem alu kemalemen ate.